



Broj: 01-50-1-15-42/08  
Sarajevo, 18.12.2008. godine

DOM NARODA  
PARLAMENTARNE SKUPŠTINE  
BOSNE I HERCEGOVINE

**PREDMET: Obavještenje**

Dana 17. 12. 2008. održan je prvi dio 42. sjednice Predstavničkog doma.

Obavještavamo vas o razmatranju materijala o kojima je obavljeno glasanje a koji su u nadležnosti i Doma naroda:

1. Prijedlog zakona o zaštiti i dobrobiti životinja (drugo čitanje);
2. Prijedlog zakona o genetski modificiranim organizmima (drugo čitanje);
3. Prijedlog zakona o Agenciji za razvoj informacionog društva BiH (ZARID) (drugo čitanje);
4. Prijedlog zakona o graničnoj kontroli, s Mišljenjem Zajedničke komisije za odbranu i sigurnost;
5. Prijedlog zakona o kontroli kretanja oružja i vojne opreme, s Mišljenjem Zajedničke komisije za odbranu i sigurnost;
6. Izvještaj komisije Kolegija o nastojanju za postizanje saglasnosti o prijedlogu za izjašnjanje Doma da se Prijedlog zakona o dopuni Zakona o Javnom RTV sistemu BiH razmatra i u drugom čitanju;
7. Izjašnjanje Doma o određivanju novog roka za dostavljanje Izvještaja o Prijedlogu zakona o izmjenama i dopunama Zakona o proizvodnji naoružanja i vojne opreme;
8. Prijedlog odluke o dopuni Odluke o imenovanju članova Vijeća nacionalnih manjina u BiH (predlagač: Zajednička komisija za ljudska prava, prava djeteta, mlade, imigraciju, izbjeglice, azil i etiku);
9. Davanje suglasnosti za ratifikaciju:
  - a) Sporazuma o zračnom saobraćaju između Vijeća ministara BiH i Vijeća ministara Ukrajine,
  - b) Sporazuma o kulturnoj suradnji između Vijeća ministara BiH i Vlade Narodne Republike Kine;
  - c) Nota Sporazuma između Bosne i Hercegovine i Kraljevine Norveške o reviziji sukcesije bilateralnih sporazuma zaključenih između bivše SFRJ i Kraljevine Norveške;
  - d) Evropskog ugovora o glavnim unutrašnjim plovnim putevima od međunarodnog značaja (AGN);
  - e) Protokola između Vijeća ministara BiH i Vlade Republike Mađarske u vezi sa sukcesijom bilateralnih međunarodnih ugovora zaključenih između Federativne Narodne Republike Jugoslavije/Socijalističke Federativne Republike Jugoslavije i Narodne Republike Mađarske;
  - f) Akata XXIII. kongresa Svjetskog poštanskog saveza – Bukurešt 2004.

### Ad. 1.

Predstavnički dom usvojio je Prijedlog zakona o zaštiti i dobrobiti životinja u drugom čitanju sa sljedećim amandmanima:

#### Amandman I.

U članu 2. u tački d) umjesto riječi: "napuštenih i izgubljenih" dodaju se riječi: "napuštenih, izgubljenih i uginulih".

#### Amandman II.

U članu 3. iza tačke dodaje se nova rečenica koja glasi: "Zabranjeno je životinju mučiti i namjerno izlagati stresu i strahu".

#### Amandman III.

U članu 4. Prijedloga zakona vrše se sljedeće izmjene:

- na kraju tačke f) umjesto interpunkcijskog znaka "tačka-zarez" stavlja se zarez i dodaje tekst: „uključujući borbe pasa, bikova, medvjeda, pijetlova, kao i svih ostalih životinja“;
- u tački i), nakon riječi „životinje“, stavlja se interpunkcijski znak "tačka-zarez" i ostatak teksta briše se;
- u tački j), nakon riječi "lovu", dodaju se riječi: "i ribolovu";
- nakon tačke v), dodaju se nove tačke z), ž), aa), bb), cc), dd), ee), ff), gg), hh), i ii) koje glase:

“z) upotrebljavati nedopuštene zamke za hvatanje životinja;

ž) uzgajati životinje u svrhu proizvodnje krzna;

aa) držanje životinja u cirkusima te njihovo korištenje u cirkuskim predstavama s drugim životinjama;

bb) organizirati trke pasa na tvrdim podlogama;

cc) koristiti tehničke uređaje, pomoćna sredstva ili naprave kojima se u obliku kazne utiče na ponašanje životinja, uključujući bodljikave ogrlice ili sredstva koja uključuju upotrebu električne struje ili hemijskih supstanci;

dd) uzgajati životinje na način da trpe bol, patnju i strah te ih namjerno ozljeđivati, protivno pravilima struke, odnosno najnovijim naučnim dostignućima, te uvoziti i prodavati životinje koje potiču iz takvog uzgoja;

ee) povećavati agresivnost životinja selekcijom ili drugim metodama;

ff) davati žive životinje kao nagrade u igrama na sreću;

gg) prisiljavati životinje na ponašanje koje kod njih izaziva bol, patnju, ozljede ili strah;

hh) izlagati životinje nepovoljnim temperaturama i vremenskim uslovima, protivno prihvaćenim zoohigijenskim standardima za pojedinu vrstu ili nedostatku kisika, čime se kod životinja uzrokuje bol, patnja, ozljede ili strah;

ii) zanemarivati životinje s obzirom na njihovo zdravlje, smještaj, ishranu i njegu.”

#### Amandman IV.

U članu 5. iza tačke e) dodaju se nove tačke f) i g) koje glase:

“f) ne izlagati životinju ekstremnoj toploti ili hladnoći;

g) osigurati životinji dovoljno kretanja”.

#### Amandman V.

U članu 6. stav (3) mijenja se i glasi:

“(3) Zabranjeno je držati kao kućne ljubimce životinje koje su zaštićene, divlje životinje, te životinjske vrste i pasmine koje su opasne za život”.

Dodaje se novi stav (4) koji glasi:

“(4) Imaoci kućnih ljubimaca moraju osigurati kontrolu razmnožavanja životinja pod svojim nadzorom.”

**Amandman VI.**

Nakon člana 6. dodaje se novi član 6a. koji glasi:

**“Član 6a.**

Uzgoj kućnih životinja namijenjenih prodaji ne može početi bez rješenja o zadovoljavanju uslova koje donosi nadležno ministarstvo, na prijedlog Ureda.”

**Amandman VII.**

U članu 7. dodaje se stav (3) koji glasi:

“(3) Ured će voditi registar svih označenih pasa i mačaka”.

**Amandman VIII.**

Član 8. Prijedloga zakona mijenja se i glasi:

- (1) Kućni ljubimci ne smiju se prodavati licima mlađim od 18 godina osim ako imaju dozvolu (ako su u pratnji) roditelja ili staratelja.
- (2) Zabranjena je prodaja egzotičnih životinja i životinja koje su zakonom zaštićene.
- (3) Zabranjena je prodaja kućnih ljubimaca na pijacama i sajmovima.
- (4) Prodaja kućnih ljubimaca dozvoljena je samo u trgovinama za prodaju kućnih ljubimaca koje ispunjavaju posebne uslove i za to izdato rješenje nadležnog organa:
  - a) da se za svaku životinju osigura dokaz o njenom porijeklu i zdravstvenom stanju;
  - b) da su zaposleni u trgovinama osposobljeni za brigu o životinjama i za izdavanje pisanog uputstva o odgovarajućem načinu držanja životinja koje prodaju.
- (5) Zabranjeno je prodavati pse i mačke u trgovinama za prodaju kućnih ljubimaca.
- (6) Posebne uslove iz stava (4) ovog člana, te uslove za osposobljenost osoblja i način propisivanja uputstva iz stava (4) b) propisuje nadležni organ.

**Amandman IX.**

U članu 10. u stavu (4) tačke i) i k) brišu se.

**Amandman X.**

Iza člana 15. dodaje se novi član 15a., koji glasi:

**“Član 15a.**

- (1) U klaonici se sa životinjama mora postupati na sljedeći način:
  - a) životinje za klanje treba po prispieću istovariti iz prijevoznog sredstva uz upotrebu odgovarajuće opreme, da se poštede uznemirenosti, straha, patnji i bolova,
  - b) kretanje životinje unutar kruga klaonice do prostora za smještaj treba se odvijati pažljivo i bez nanošenja boli, uz primjenu odgovarajućeg pribora za vođenje,
  - c) klaonice moraju biti opremljene odgovarajućim oborima ili stajama u koje životinje treba da budu smještene, zaštićene od nepovoljnih klimatskih uslova, hranjene i napajane do klanja,
  - d) životinje moraju biti omamljene odgovarajućim postupcima neposredno prije klanja, kojim se moraju dovesti u stanje neosjetljivosti i u tom stanju usmrtniti.
- (2) Klanje se mora obaviti upotrebom odgovarajuće opreme.
- (3) Bolesne i povrijeđene životinje treba klati na samom kraju klanja, poslije zdravih životinja, bez dodatnog izazivanja boli i mučenja.
- (4) Detaljne uslove za zaštitu životinja prilikom klanja propisuje nadležno ministarstvo, na prijedlog Ureda.
- (5) Životinja se ne smije zaklati ako nije izvršen veterinarski pregled prije klanja i ako nije omamljena na propisan i stručan način.”

**Amandman XI.**

Iza člana 16. dodaje se novi član 16a. koji glasi:

### **“Član 16a.**

- “(1) Zabranjeno je prevoziti životinje ako bi se prijevozom izazvale patnje, bol, mučenja, oboljenja, uginuća životinja kao:
- a) utovar i prijevoz tokom velike vrućine ili hladnoće,
  - b) prijevoz u nepokrivenim kamionima, vagonima, dijelu plovila pri, čemu životinje nisu zaštićene od klimatskih uslova,
  - c) prijevoz u zatvorenim prijevoznim sredstvima, kavezima, ambalažama, ako u njima nije osigurano provjetravanje,
  - d) prijevoz životinja osjetljivih na niske ili visoke temperature ako u prijevozu nije osigurana odgovarajuća temperatura,
  - e) prijevoz bez osiguranja od samopovređivanja životinje, povređivanja drugih životinja ili ispadanja iz prijevoznog sredstva,
  - f) prijevoz bez osiguranog hranjenja, napajanja i odmora životinja u propisanim intervalima,
  - g) prijevoz bolesnih životinja ili u slučaju kad postoji sumnja da su bolesne ako nije osigurana veterinarska pomoć,
  - h) prijevoz životinja za koje postoji sumnja da boluju od zaraznih bolesti,
  - i) prijevoz vodenih životinja u posebnim prijevoznim sredstvima ili spremnicima bez dovoljne količine vode, odgovarajuće temperature i kisika,
  - j) prijevoz ženki u posljednjoj četvrtini bremenitosti, ženki u prvih 48 sati nakon okota i njihove mladunčadi osim ako je potrebna hitna veterinarska intervencija,
  - k) zabranjeno je prevoziti materijale u istom prijevoznom sredstvu koji bi mogli biti opasni za njihovo zdravlje i život.
- (2) Obavljanje prijevoza na neki od načina iz stava (1) ovog člana smatra se mučenjem životinja.
- (3) Prijevoznik je dužan osigurati zaštitu od opasnih i divljih životinja, te njihovu fizičku zaštitu, a prijevozno sredstvo mora biti tako označeno da upozorava da se prevoze opasne ili divlje životinje,
- (4) Prijevoznik je dužan odrediti lice koje će se tokom prijevoza brinuti o ispunjavanju propisanih uslova za transport životinja, njihovom napajanju, hranjenju i odmoru, a koje mora biti stručno osposobljeno, čiji program obuke i osposobljavanja propisuje nadležno ministarstvo.
- (5) Pri utovaru, istovaru, pretovaru i tjeranju zabranjena je upotreba predmeta kojima se direktno nanosi bol životinji.”

### **Amandman XII.**

U članu 21., u naslovu, brišu se riječi: “i cirkusa”, kao i u tekstu riječ “cirkusima”.

### **Amandman XIII.**

U članu 22., u naslovu, brišu se riječi: “i cirkus”.

U istom članu u stavu (3) brišu se riječi: “cirkuske priredbe sa životinjama”.

U stavu (4) brišu se riječi: “cirkuskih priredbi sa životinjama i”.

### **Amandman XIV.**

U članu 25. stav (1) na kraju tačke c) dodaju se riječi: “i omogućiti joj dovoljno kretanja”.

U istom stavu dodaju se nove tačke f), g), h) i i) koje glase:

“f) izvršiti obaveznu sterilizaciju i kastraciju svih pristiglih napuštenih izgubljenih životinja nakon isteka roka iz stava (2) ovog člana;

g) primati prijave o napuštenim i izgubljenim životinjama;

h) angažirati se na udomljavanju životinja i prolanaženju vlasnika;

i) mikročipovati svaku pristiglu životinju ako ona već nije mikročipovana.

U istom članu, iza stava (3), dodaje se novi stav (4) koji glasi:

“(4) Sklonište za životinje osniva fizičko ili pravno lice, jedinica lokalne samouprave, općina, grad, kanton ili entitet.”

Sadašnji stav (4) postaje stav (5), a na kraju ovog stava dodaju se riječi: “te vodi upisnik skloništa za životinje”.

**Amandman XV.**

U členu 28., nakon stava (6), dodaje se novi stav (7) koji glasi:

“(7) Imaoci životinja za eksperiment dužni su da:

- a) životinjama za eksperimente pruže smještaj, hranu, vodu, brigu adekvatnu njihovom zdravlju i dobrobiti;
- b) svedu na minimum ograničenja s ciljem zadovoljenja njihovih psihičkih i etioloških potreba;
- c) nadgledaju okruženje u kojem se nalaze;
- d) svakodnevno provjeravaju njihovu dobrobit i zdravstveno stanje;
- e) otklone uzroke nezgoda, trpljenja, bol na najbrži mogući način;
- f) obilježe životinje i vode evidenciju.”

Sadašnji stav (7) postaje stav (8).

**Amandman XVI.**

U členu 37. u tački f) riječ “cirkusima” briše se.

U istom členu dodaju se nove tačke l) i m) koje glase:

“l) Odluku o uslovima koje moraju ispunjavati uzgajivači kućnih životinja namijenjenih prodaji;

m) Odluku o uslovima za prodaju kućnih ljubimaca u trgovinama za prodaju kućnih ljubimaca, te uslove za osposobljenost osoblja.”

**Amandman XVII.**

U členu 38. tačka d) mijenja se i glasi:

d) “drži kao kućne ljubimce životinje navedene u členu 6. stav (3) ovog zakona”.

U istom členu dodaje se nova tačka n) koja glasi:

“n) obavlja radnje u suprotnosti s članom 6a.”

**Amandman XVIII.**

U členu 39. u tački h) iza riječi “16” dodaju se riječi: “i 16a.”

U istom členu u tački i) iza riječi “15” dodaju se riječi: “i 15a.”

U istom členu dodaje se nova tačka s) koja glasi:

“s) obavlja radnje u suprotnosti s članom 16a.”

**Amandman XIX.**

U členu 40. dodaju se novi st. (2), (3), (4) i (5) koji glase:

“(2) Imaoci pasa i mačaka dužni su da mikročipuju i upišu u registar svoje kućne životinje rođene, odnosno nad kojima je stečeno vlasništvo prije stupanja na snagu ovog zakona, u roku od šest mjeseci od dana stupanja na snagu ovog zakona.

(3) Skloništa za životinje iz člana 25. moraju se osnovati u roku od godine dana od stupanja ovog zakona na snagu.

(4) Do osnivanja skloništa za životinje iz člana 25. ovog zakona, od tijela predviđenih ovim zakonom, veterinarske stanice mogu, u saradnji s nadležnim općinskim tijelima, provoditi kastraciju, sterilizaciju i obilježavanje napuštenih životinja, naročito pasa lotalica, te njihovo ponovno puštanje na mjesta prirodnog staništa, a s ciljem stabilizacije populacije napuštenih životinja kontrolom njihove reprodukcije u kratkom roku.

(5) Odredba iz člana 4. o zabrani uzgoja životinja u svrhu proizvodnje krzna stupit će na snagu 2018. godine.”

**Ad. 2.**

Odgođeno je izjašnjavanje o Prijedlogu zakona o genetski modificiranim organizmima u drugom čitanju. Nadležna Ustavnoopravna komisija zadužena je da sagleda sve nove aspekte i do sljedeće sjednice (nastavka 42. ili nove sjednice) pripremi prijedloge po novim aspektima, nakon čega će ponovo biti otvorena rasprava o Prijedlogu zakona u drugom čitanju.

**Ad. 3.**

Odgodeno je izjašnjavanje o Prijedlogu zakona o Agenciji za razvoj informacionog društva BiH (ZARID) u drugom čitanju. Nadležna Komisija za saobraćaj i komunikacije zadužena je da sagleda sve nove aspekte i do sljedeće sjednice (nastavka 42. ili nove sjednice) obavijesti Dom o svojim prijedlozima, nakon čega će ponovo biti otvorena rasprava o Prijedlogu zakona u drugom čitanju.

**Ad. 4. i 5.**

Predstavnički dom nije usvojio negativna mišljenja Zajedničke komisije za odbranu i sigurnost. Prijedlog zakona o graničnoj kontroli i Prijedlog zakona o kontroli kretanja oružja i vojne opreme ponovo su vraćeni Zajedničkoj komisiji radi izrade novih mišljenja.

**Ad. 6.**

Nakon što u Kolegiju nije postignuta saglasnost o prijedlogu nadležne komisije da se Prijedlog zakona o dopuni Zakona o Javnom RTV sistemu BiH razmatra i u drugom čitanju, u drugom krugu glasanja ovaj prijedlog nije usvojen, što znači da će Prijedlog ovog zakona biti razmatran i u drugoj komisijskoj fazi.

**Ad. 7.**

Dom je odobrio produženje roka za 30 dana za dostavljanje Izvještaja o Prijedlogu zakona o izmjenama i dopunama Zakona o proizvodnji naoružanja i vojne opreme.

**Ad. 8.**

Predstavnički dom usvojio je Odluku o dopuni Odluke o imenovanju članova Vijeća nacionalnih manjina u BiH. U Vijeće nacionalnih manjina U BiH iz crnogorske nacionalne manjine imenovana je Hidajeta Redžić.

**Ad. 9.**

Dom je dao saglasnost za ratifikaciju:

- a) Sporazuma o zračnom saobraćaju između Vijeća ministara BiH i Vijeća ministara Ukrajine,
- b) Sporazuma o kulturnoj saradnji između Vijeća ministara BiH i Vlade Republike Kine,
- c) Nota Sporazuma između Bosne i Hercegovine i Kraljevine Norveške o reviziji sukcesije bilateralnih sporazuma zaključenih između bivše SFRJ i Kraljevine Norveške;
- d) Evropskog ugovora o glavnim unutrašnjim plovnim putevima od međunarodnog značaja (AGN);
- e) Protokola između Vijeća ministara BiH i Vlade Republike Mađarske u vezi sa sukcesijom bilateralnih međunarodnih ugovora zaključenih između Federativne Narodne Republike Jugoslavije/Socijalističke Federativne Republike Jugoslavije i Narodne Republike Mađarske;
- f) Akata XXIII. kongresa Svjetskog poštanskog saveza – Bukurešt 2004.

S poštovanjem,

PREDSJEDAVAJUĆI  
PREDSTAVNIČKOG DOMA  
**Niko Lozančić**